

霄王清王長生護命秘法傳付下世首教於  
 我以布世間學真之士佩法修行永為身寶  
 上衛帝王安鎮國土享祚萬年下以為民延  
 生度厄學道成真面拜真王驅除六天降伏  
 魔魅用以施行符檄召攝鬼神一如神霄王  
 所教及德會萬祖宗緒親離苦昇遷一身  
 蒙福萬萬安樂次使自身得道尸解隱遷代  
 代流傳法門護持使道通達輕泄漏慢風刀  
 考身萬劫不原學士行之切宜遵守矣

高上神霄玉清真王紫書大法卷之一

總序大法源

大羅紫府天中有諸星府諸帝之會天帝之  
 闕萬二千八十所隸各有司存悉皆檢察人  
 間善惡功過別無紀籍以為報施故貧賤富  
 貴壽夭未嘗為之子奪盡出人之自召示應  
 詣府闕以  
 昊天玉皇上帝為宗師而神霄玉清王今玉  
 帝就命人主準神霄玉清府又隸諸地山嶽  
 鬼神與北極紫微大帝府符命不同又非  
 混元上德皇帝所授三天教輔元大法師  
 秘籙一等今神霄玉清府神吏所轄諸地鬼  
 神告策并靈官神吏使者將軍驅使吏兵異  
 號玉司考召靈文行此法每月三九日神霄  
 玉府神吏降聖朝會勿飲食葷酒戒色持齋  
 切須謹之

論籙

神霄法籙七階以流傳於人世自古以來未  
 嘗降見今得之者扶身保命度厄延年奉之  
 者仙官降祐消殄災非行之者却滅邪姦誠

除魔鬼當值斯文之士告盟神霄中奉主宰  
 得獲昭報然後方可奉行不可超越造次擅  
 用切宜遵守為尚矣

論秘訣

神霄玉文瓊臺秘訣則無所不關無所不攝  
 若能自保以奉持則坐持衆妙立使萬神寂  
 然不動感而遂通與衆法不同諸符不一倘  
 值斯文之士萬劫一得有緣有幸無極無窮  
 可不勉勵精誠上祈真覲若始勤終怠口是  
 心非法中靈官將吏記人功過毫分無失當  
 是時三官鼓筆無恕勿示非人豈不可謹勉  
 之戒之

論妙旨

神霄秘文玉司妙旨是謂玄奧難可尋詳雖  
 有秘籙依科修奉未有訣自要旨喻若衣服  
 裁削已了究竟不縫如何披穿諶者縫也今  
 將萬世秘文示學真之士乃若堅持苦志將  
 心救物法籙剪邪以皈正仙兵佐助以隨行  
 日就月將可達神霄之境功成名遂當昇浩  
 劫之家今列于左豈不深思允蹈之手

論法

神霄法者藏于華堂不示人世今過甲辰之昌運乃道君統人主之辰所以闡妙道於斯時度靈文於寶籙不問高下傳賜奉持若延究而推之與衆法不同諸符不一但以歷懇精誠虔祈靈貺陰行陽報功業無差不可妄入鬼神情罪依條治之因以功德相拯庶使幽明咸被德澤豈曰小補之哉

誓法儀

凡行此法每月三九日神霄王府神吏降世即用燈三盞黃紙十二帖合奏狀文用通章印實封其詞上申本院燒詞畢香茶酒菓供養至誠燈滅收之如獲報應然後行持元始天王曰吾教太皇萬福真君開紫霄瓊笈九霄妙籙付於玉帝上子以闡天風傳度世人指歸正道得者自仙九陽之梵炁有九九八十一數是太陽之運太陽之日帝九陽扶桑若者積炁成神霄真王也又領南極之職與韓司陶鑄天民咸護九天乃得神霄某文天篆雲章尅日升霄華堂之經總載必仙

之實內有十品之科子過其文以東華注名尅日成真此文有金英靈童一萬人天素真妃一千人常保其書燒香散華以利功過兆稍有違七祖一身常遭神獄之考傳者以金龍玉魚禁錮以付之告盟十天若失齋妄泄師與弟子同罪七祖入北都萬憲不原此以之以戒宣盟

天民齋辦法

百穀五味流入脾胃五藏安寧尸邪亡墜七祖上生天小兆得仙位長生入九霄久視通聖急急如高上神霄東華仙君律令敕右法取東華炁咽之再取炁吹使百骸九竅調和三尸九蟲消滅

天民梳頭法

玉頂之上泥丸絳室玄華寶精天帝景色長存玉林神光表異右為隱月左為隱日六合清練百神化密急急如高上神霄大帝律令敕

右法面對生炁方取炁咽之方梳頭反白成黑大吉大昌也

天民沐浴冠帶法

玉晨寶冠雲帔霞裳虎肅制魔流金吐精五濁遠去八景光明令臣受賜罪削福臻長與神霄齋真上靈急急如高上五老天君律令敕

右法存五帝玉女自月而下玉童侍立取生炁吹入水中方可沐浴

天民盥漱法

天清地明日月輝晨灌我五體光赫王清炁不受垢五藏華榮罪消北都禍滅九真惡邪伏匿福連上清今日鍊沐一切受恩身生羽服昇入帝庭急急如南極長生大帝律令敕右法合目存仙人玉女五色霞衣四獸獅子白鶴在面前日月輝光入水中叩齒三十六通東向取炁吹入水中先服一口然後用之

天民出入法

奉佐玉清佩泰神虎出日入月開明八景六甲隨神六丁從行利貞天地扶贊勾陳七星輔衛億保長生五雷兵甲與列淨真刀兵水

火得離身形犯我天敕魁星越行急急如高  
上玉清消魔帝君律令敕

右法早吸日光晚吸月光一口吹在左右  
辟邪萬災惡人斷口舌呪詛

天民解衣法

受命天帝上升九天百神安位列侍神仙魂  
魄和柔五藏華豐百體生液七精靈盈火令  
交煥滅鬼除光上願神霄神府長真德劫游  
帶俠日無窮急急如高上太微天帝律令敕

右法左叩天鐘右叩天磬中鳴法鼓各三  
通解衣存太微虛室至室方卧令人精健  
不病有吉感應

天民臨卧呪

天有九星地有九宮我有九竅萬神相從三  
尸伏滅五藏流通三田四支動息守中八卦  
龍虎來侍我身妖精鬼魅萬邪不干真官肅  
靜邪孽不侵急急如高上神霄消魔王律令  
敕

右法兆取長生靈炁咽之鳴法鼓三通任  
意卧之

天民過疾服藥呪


謹請高上神霄東華五靈仙君召出天醫正  
神扁鵲吏官各五十人當令小兆服藥身得  
離病速離身駕魁乘罡登昇九天數盡九  
地命祿俱昌長生久視永不死衰急急如高  
上神霄長命天帝律令敕

右法兆念呪取神霄炁吹藥上與人服主  
離病厄痼疾皆去延壽益年常常準此

天民履穢入暗法

左德清神右命天真左有司土夫人右有除  
穢五丁令我死籍勾滅玉府上我生名急急  
如高上神霄雷部攝邪王律令  
右法兆到穢先以左手仰托日月存五丁  
司叩齒七通取炁吹自己方入暗穢之  
處

智慧消魔萬言符




神霄青帝東井鍊真丹宮元仙守保合井九  
竅通流揭朗派日光輝洞青玄玄陸通急急  
摩訶薩日月風急急如東井帝君敕

右符用戊午日以玄珠血研丹向東念呪  
用黃紙書之逐日用菖蒲咀嚙東井水下

百日心開日誦萬言天生智慧神思不妄  
洞視內明

淨穢符



敕青霄紫霄元覺神將助吾具炁斷除不祥  
李帝遊來奉救攝

右符斷除萬穢千惡或帶或帖有邪惡厭  
疊吞之立效取斗炁書若口舌官事臨身  
惡人謀害佩之即免

變神呪

高上真敕佩星披玉左雷右電騰駕龍虎凶  
凶者滅善善者育欽輪玉帝形神化速急急

如高上神霄王清王律令教

右念呪訖拋印存所用玉童王女左右內  
外金炁單身變身為仙官仍先飲神霄炁  
一口吹身即叩齒七通結神霄印默呪凡  
驅龍制鬼上章並用此法

神光符



天雷神霄地雷九壘水雷洞淵風雷扶桑鬼  
雷山嶽百谷朝陽太一令旨制鬼火燒雷迅  
天地百邪無妖下入臟腑通暢和調急急如  
太一律令攝

右符以雷發聲之日西方念呪天雷以黃  
書青上地雷以白書赤上水雷以黑書白  
上風雷蒼書黑上鬼雷白書黑上吸炁天  
九地十水五風三鬼一面方咽之吞符一  
日百邪見之奔走聲若急雷百脉和通小  
兒驚風飛尸所中布炁即安

天地真陰真陽二炁符



天地八九人神六七清混金澄清濁分立入  
吾神田太倉受福洞宮清微穢氣勿觸急急  
如太上神霄玉清王律令

右符以冬至日并立夏日面向西吞地炁  
十八口夏至面向東吞天炁十九口念呪  
吹符陽日朱書陰日黑書吞之四肢調和  
百病不侵

日月極晦九炁符



日遊月真太陰圓缺寒往暑來太陽盈昃內  
存三尸百關布列一入真炁尸虫走滅急急  
如太上神霄玉清王律令

右符以日盈月滿日用舌吹吐日九炁月  
十炁成符吞帶去三尸九蟲炁吐毒消吹  
鬼鬼滅也


東華木公符



南極韓司丈人符




西靈金母符




北玄君符





中央黃老符



玉章聖號龍章天書



玉章聖號龍章天書此文出自赤明浩劫之時上封付八子以鎮天宮隱於神霄天總真閣玉女天仙三萬人常護其文若水火大災朱書擲於水火之中不傷兆身若行佩帶吞服則百邪奔走萬病消除水怪潛形妖龍藏伏如欲超度九玄七祖苦爽窮魂如法以黃地朱書告付三官皆即超化上生天堂受諸

快樂此文不傳下士若有修學之人一心受佩得補天仙輕泄漏慢死入北邙

混元八帝宗枝圖

玉清大帝

玉清左晨王

玉清晨景王

玉清消魔王

玉清高晨王

玉清元始王

太上老君

玉清九真王

玉清大和王

青金丹皇王

玉清寶景王

玉戶太素王

玉清大帝王

上帝司禁王

神霄玉清王

青華大帝君

蓬萊靈海帝君

西元大帝君

元始天王

玉皇大帝

東井大帝君

清都大帝君

清霄大帝君

中皇司命君

小有玉名

扶桑大帝君

玉寶青童君

太一元紫君

玉華三元君

玉清紫微君

玉清保仙君

玉清明昭君

玉清三元君

上清道君

九皇司命君

金華元君

太陽玉賢君

三元紫陽君

皇上玉帝君

玉清大素王

玉清大道君

玉清紫元君

玉清內景王

元始八子封職

長子高上元始化生南極長生大帝君任高

上神霄玉清王職太陽九炁玉賢君玉清保

仙王諱混洞字曜華

次封保生大君任東華帝君職青華帝君玉

清太和王諱永洞字曜煜

次封掌命大君任蓬萊靈海君諱濛洞字曜

次封護命大生君任蓬萊西元大帝君諱濟

字曜文

次封明皇大君任東井大帝君諱沈洞字曜靈

次封非卿大君任清都帝君諱清洞字曜機

次封南極大君任清靈帝君諱沈洞字曜神

第八子封北臺大君任九天都衛玉霄紫清

中皇大君諱沈洞字曜元

八帝封號官品職任

第一子任神霄玉清天王絳霄太平應化道

主天帝遙領東極扶桑太陽九炁君

第二子任青霄好音元真寶耀天帝遙領東

華大帝君

第三子任碧霄開虛傳度天王遙領蓬萊主

仙君

第四子任景霄至妙聖空天王遙領西元青

金丹聖君

第五子任玉霄天王遙領東極玉寶高晨師

青帝青童君

第六子任琅霄六闕傳濟天王遙領青都帝

君

第七子任紫霄雙開化身天王遙領小有玉

真萬華青都君

第八子任太霄流光變景天王遙領九天中

皇玉帝君

玉帝有八子昔混明大化元始與梵炁祖母

行大洞雌雄回風混合結八十一正陽之炁

生長子神霄玉次結七十二純陽之炁生次

子青華君次結六十三真陽之炁生第三子

次結五十四梵陽之炁生第四子次結四十

五昌陽之炁生第五子次結三十六光陽之

炁生第六子次結二十七霞陽之炁生第七

子次結一十八寶陽之炁生第八子皆是大

洞混合元父玄母雌雄九變混合九陽一炁

變靈為魂合風為魄為之帝一嬰兒生成九

帝七九之道千端萬化諸天高上之玉帝皆

八王之異號故明九陽天真也皆出大洞三

十九章回風混合帝一之道兆之反胎於天

何以得穢津汚體結胎而為嗣乎兆知此道

白日昇天失此永墮幽玄兆思之玉聖萬帝

由不離大洞而為入真何况介蟲尸賊不知

真一而得一體效仙王乎哉

神霄九師

當初神霄降世三師聚議於碧霄天如今三師各有神霄法惟三師便是神霄總霄其中又有雷祖大帝劫是昊天玉皇上帝主之祖師高上神霄玉清真王長生保命天尊主之晴雨宗師青華大帝君定福天尊主之斷瘟斷邪役召萬靈真師九天益算司命好生可轉君丈人真君保福天尊所轄度魂攝魄外六師自有正法各隨所治靈師應元定籍真君注命天尊掌雷敕令牌號動雷合奏之玄師保命化生真君保命天尊掌五嶽江湖淮海渾洞神龍聖師節度總監真君萬安天尊掌攝魂度亡煉度擒邪伏祟寶師元華保生真君儲祥天尊掌九霄法律管三十六種橫死天亡天師掌法主籍真君木稼天尊掌神霄三十六天梵炁真符專修煉法官成道有雷函神師掌令降命真君吉集天尊掌天下效慶山谷五胞五百不正之神聖師遇齋醮當稱保生度化天尊九師各有心章請官君

不問神霄嗣法當以五臟精炁神等符為先內精既竭非假元始炁炁以續所虧何得神炁復本先須內養其神霄之道方成萬神我神霄乃霄天大要不走元神也

高上仙王降真符



元皇召靈符



敕符呪

元綱流演總御十方招真召靈威神無執符至八極壽命吉昌保命度厄萬里混康急急如高上神霄玉清真王律令  
右法玉清訣念呪取東南炁吹入符中烈火香上焚之再呪曰

通靈通玄淨心洞明招真金童召靈王女為臣上達真炁降臨顯揚輔化我道合靈  
右法正月降召上真七月召中真十月召下真八月召上靈本命降中靈十月降下靈存局中學不罵信五嶽試人也

朝真玉符呪

真霄真敕九天浩旨付吾稟受得見光輝南昌煉形太微得質青龍甲乙白虎庚辛朱雀丙丁玄武壬癸吏兵導引真符接衛上列神霄服依實陸急急如高上保仙王律令

朝真玉符



右符黃羅青書佩之此取神霄王下降日依法朝真想東方青炁成符此符又名無邊符如有凶惡邪祟極難治者當恰神府目念總呪巽炁將此符去患人家司命前夜靜用酒菜一分金錢一束燒之立應

聖降日

凡八月九日青華降世之日十月十日真王降世之日每月三九日三元八節日可誦都呪千遍吞二十一符禱之立應每降日燈三盞黃紙一十二分一獻狀獻之用時新五菓供養燈盞收之忌葷酒厭物也

高上神霄玉清真王紫書大法卷之一

高上神霄玉清真王紫書大法卷之二 意

朝禮儀

每行持凡遇九日并聖降日焚香望西北禮三清上聖十極高真昊天上帝教主道君皇帝九拜次望正南禮祖師南極長生大帝長生保命天尊真師九天益算好生韓君丈人真君九拜次望正東禮宗師東極青華大帝神霄救苦太一天尊九拜次望東南禮高上神霄真王神府中一切真聖仙官九拜三上香面東長跪啓白

具法位臣姓某誠惶誠恐稽首頓首再拜上答高上玉清府中真聖臣今謹依行持神霄大法上願入志億會萬祖幽魂苦爽超升天界自身安泰福祿延長願臣學道成仙而禮神霄飛遊金闕謹言九拜是若老儀或若者不能禮拜心拜亦得

誦神霄炁行持

每早日出時上學望東南想心拜三十六拜叩齒三十六遍存真炁結成神霄帝君即存三十六天金光玉臺青青之炁琅光之中見神霄真王左日右月真王口吐青炁以口吸

八八六十四咽布於上丹田作一輪日次吸三十六口入中丹田作青珠一枚如水中有帝君說七拜呪曰

青華帝君神霄真王扶桑日帝西極月皇四真三炁結青朗光鎮布三田内存真炁服吞

日華上昇金光日月內運丹田宮碧房啞成玉體吸入瓊光妖鬼自除三尸滅亡三九得七面禮仙王急急如高上神霄玉清王律令右法誦服百日得尸解之道此炁能敗千鬼百魔去瘴疫癘也

九霄分布洞陽之圖

